

Sinterklaos

De lôch hông al ein bietje vol van de winter, wie ik vanaaf de Gelderse paort de stad in leep.
Beej d'n bekker waas 't al lekker drök.

Ik gaon dao gewuunlik altiéd efkes aan veur ein hard brutidje en ein zaach präötje.

Naeve mich stônd eine mins met zônne hiele wieje opruumingsjas aan, van ein ôndefinieerbare paeper en zalt kleur.

Zien bolle wange hadde de vorm van eine fiene sauzepreuver, dus duudelik emus met smaak.
Gezellig hê zaete taeye mich, dae Sinterklaostiéd, ouk al môt Sinterklaos taegeswaordig waal oetkiêke dette neet de nek brik euver al die kersbuim in de stad.

En ziene breije lach veugde nog ein serie rimpels toe aan zien toch al aanzienlikke collectie.

De bekkersvrouw makde hiel vrintelik ein ind aan ôs einrichtings gesprek.

Waat maag 't zien vroeg ze op zôn leve meneer desse 't leefs de ganse bekkerie laeg zoels wille kaupe.

Och juffrouw zaet det menke, ik had gaer eine flinke groëte speklaasieman, maar dan in de vorm van eine echte alderwetse Sinterklaos, dae mich ein bietje aan Kees Tabbers duit dinke.

Dae speklaasieman môt waal good gevöld en rôndborstig zien wie die bekkers van ôg, de meiter had ik gaer van de raumigste marsepein, de veut motte gevormp waere van de schitterendste fôndant dae 't guüf.

D'n tabbert had ik gaer aafgebies met de fienste amandele die geej kint kriège, en allein de allerwitste poeiersôkker is good genôg um d'n baard aaf te poeiere.

De staaf van Sinterklaos môt moi gedreijd waere zoëdet de kröl precies halverwaege de meiter kump te zitte.

't Ganse gehiël had ik dan nog gaer aafgewerk met kluntjes die eigelik te fônkelend zien um in de kluntjesmik te verwerke, maar net good genôg veur miene speklaasieman.

Met andere wäörd, dae Sinterklaos môt d'r oetzeen offe zoë op zien paerd kint stappe en zien werk op de dake kint gaon doen.

't Waas moësstil gewaore in de bekkerie, zelfs de bekkers stônde met de mônd vol tand, en det gebeurt maar uuters zelde.

Idderein in de winkel waas al ein bietje sjeloers op daegene dae op pekskesaovend zônne moi opgemaakte speklaasieman ging kriège.

Jaomaar zaet de bekkersvrouw hielemaol van zien a pro po, zônne moi opgemaakte speklaasieman kos ôg zeker 75 euro.

Det is good zaet 't menke, weit ge waat? ik kôm um morgevruug um dezen tiéd waal ophaole, en hae stiefelde greuzelend de lômstraot op.

Ik stond met mien oëre te wappere en waas zoë nieschierig gewaore det ik 'sanderdaags 'smorges weer ik de bekkerie stônd wie det menke zien prônkstök aaf kwaam haole.

Heej isse dan, zaet de bekkersvrouw hiel gruüts, zal ik um ôg moi inpakke in orgineel Sinterklaospepeer?

Maar nae, zei 't Menke, inpakke hoof neet, ik aet um heej waal op.

Stôm hé

Wiel Hermans Venlo